

欽
定
全
唐
文

欽定全唐文卷九十四目錄

哀帝二

均文武俸料勅

皇太后冊禮再改期勅

彗星見避正殿勅

貶裴樞崔遠勅

妖星不見勅

誅裴樞等勅

貶裴贇李煦勅

欽定全唐文

卷九十四

目錄

貶敬詔勅

停貢檄攬勅

令張全義攝行太尉中書令勅

放司空圖還山勅

獎朱全忠收荆襄勅

禁論認洛陽田宅勅

改卜郊勅

五日聽朝勅

禁宮人擅出內門勅

追戮蔣元暉勅

追廢皇太后何氏勅

停郊祀勅

責授張廷範等勅

誅張廷範等勅

賜柳璨自盡勅

冊吳王錢鏐勅

明經科準常例送禮部勅

允增貢舉額數勅

停戎昭軍額勅

停忠義軍額勅

令崇勲殿候對勅

黜邠王震勅

停河南監牧諸司勅

獎王茂章勅

禪位冊文

欽定全唐文卷九十四

哀帝 二

均文武俸料勅

文武二柄國家大綱東西兩班官職同體咸匡聖運共列
明廷品秩相對於高卑祿俸皆均於厚薄不論前代祇考
本朝太宗皇帝以中外臣寮文武參用或自軍衛而居臺
省亦由衣冠而秉節旄足明於武列文班不令分清濁優
劣近代浮薄相尚凌蔑舊章假偃武以修文競棄本而逐
末雖藍衫魚簡當一見而便許升堂縱拖紫腰金若非類

而無令接席以是顯揚榮辱分別重輕遽失人心盡隳朝體致有今日實此之由須議改更漸期通濟文武百官自一品以下逐月所給料錢並須均勻數目多少一般支給兼差使諸道亦依輪次差遣既就公平必期開泰叶羣情於天下崇故事於國初凡百臣庶宜體朕懷

皇太后冊禮再改期勅

朕獲荷丕圖仰遵慈訓爰崇徽號已定禮儀冀申爲子之心以展奉親之敬昨所司定今月二十五日行皇太后冊禮再奉慈旨以宮殿未停工作蒸暑不欲勞人宜改吉辰

固難違命冊禮俟修大內畢功日所司以聞

彗星見避正殿勅

朕以冲幼克嗣丕基業業兢兢勤恭夕惕彗星謫見罪在朕躬雖已降赦文特行恩宥起今月二十四日後避正殿減常膳以明思過付所司

貶裴樞崔遠勅

朕謬將眇質叨荷丕圖常懷馭朽之心每軫泣辜之念諒於黜責豈易施行左僕射裴樞右僕射崔遠雖罷機衡尚居揆路既處優崇之任未傷進退之規不能秉志安家但

恣流言謗國頗興物論難抑朝章須離八座之榮尚付六條之政勉思咎已無至尤人樞可責授朝散大夫登州刺史遠可責授朝散大夫萊州刺史並委御史臺催促出京所在馳驛發遣

妖星不見勅

上天譴見下土震驚致夙夜之沈憂恐生靈之多難不居正殿盡輟常羞益務齋虔以申禳禱果致元穹覆祐孳彗消除豈罪已之感通免貽人於災沴式觀陳奏深慰誠懷

誅裴樞等勅

責授隴州司戶裴樞瓊州司戶獨孤損白州司戶崔遠濮
州司戶陸展淄州司戶王溥曹州司戶趙崇濮州司戶王
贊等皆受國恩咸當重任罔思罄竭唯貯姦邪雖已謫於
遐方尚難寬於國典委御史臺差人所在州縣各賜自盡
貶裴贊李煦勅

君臣之間進退以禮矧於求舊欲保初終苟自掇於悔尤
亦須行於黜責特進守司空致仕上柱國河東縣開國公
食邑二千戶裴贊早以公望常踐台司靡聞竭力以匡時
每務養恬而避事洎從請老不謂無恩合慎樞機動循規

矩雖云勇退乃有後言自爲簿從之曾頗失人臣之禮謫居郡掾用正朝綱尚謂從輕所宜自咎可責授青州司戶刑部郎中李煦可萊州司戶

貶敬沼勅

衛尉少卿敬沼是裴贄之甥常累於舅或以明經撓文柄或以私事竊化權贄已左遷爾又何道可貶徐州蕭縣尉

停貢橄欖勅

禹別九州秦分百郡勉務隨方之職須資利物之源朕所以鄙蒟醬於漢朝慕菁茅於周室用爲儆戒以省征徭福

建一道遠在海隅嘗勤土貢每年所進橄欖子頗甚勞役
往來本因閩豎生長甌閩自爲耽愛率令供進以爲定規
況非薦熟之珍仍異厥包之禮雖彰忠藎無濟闕如每年
但供進臘面茶外不要進奉橄欖子永爲常例

令張全義攝行太尉中書令勅

漢代元勲鄧禹冠諸侯之上晉朝重位王導居百辟之先
皆道著匡扶功宣寰宇其於崇寵迴異等倫朕獲以眇躬
重興丕運凡關制度必法舊章實仗勲賢永安宗社副元
帥梁王正守太尉中書令忠武軍節度使河南尹張全義

亦正守中書令俱深倚注咸正台衡其朝廷冊禮告祀天地宗廟其司空則差官攝行太尉侍中中書令即宰臣攝行今太尉副元帥任冠藩垣每遇行禮之時或不在京國即事須差攝太尉行事全義見居闕下任正中樞不可更差別官又攝中書令事其太尉官如梁王朝覲在京便委行事如却赴鎮即依前攝行所合差中書令便委全義以本官行禮其侍中司空司徒即臨時差官付所司

放司空圖還山勅

前大中大夫尚書兵部侍郎賜紫金魚袋司空圖俊造登

科朱紫昇籍旣養高以傲代類移山而釣名志樂激流心
輕食祿匪夷匪惠難居公正之朝載省載思當徇幽棲之
志宜放還中條山

獎朱全忠收荆襄勅

梁王躬臨貔武收復荆襄拔峴首若轉丸平荆門如沃雪
連收兩鎮併走二凶乃睠勲庸載深嘉注宜賜詔獎飾

禁論認洛陽田宅勅

洛城坊曲內舊有朝臣諸司宅舍經亂荒榛張全義葺理
已來皆已耕墾旣供軍賦即係公田或恐每有披論認爲

金定合月三
世業須煩按驗遂啟倖門其都內坊曲及畿內已耕植田
土諸色人並不得論認如要業田一任買置凡論認者不
在給還之限如有本主元自差人勾當不在此限如荒田
無主即許識認付河南府

改卜郊勅

先定此月十九日親禮南郊雖定吉辰改卜亦有故事宜
改取來年正月上辛付所司

五日聽朝勅

漢宣帝中興五日一聽朝歷代通規永爲常式近代不循

舊儀輒隳制度既姦邪之得計致臨視之失常須守舊規以循定制宜每月只許一五九日開延英計九度其入閣日仍於延英日一度指揮如有大段公事中書門下具牒子奏請開延英不計日數付所司

禁宮人擅出內門勅

宮嬪女職本備內任近年以來稍失儀制宮人出內宣命案御參隨視朝乃失舊規須爲永制今後每遇延英坐朝日只令小黃門祇候引從宮人不得擅出內門庶循典儀免致紛雜

追戮蔣元暉勅

蔣元暉身居密近擅弄威權鬻爵賣官聚財營第而包藏悖逆稔浸姦邪雖都市已處於極刑而屈法尚慊於衆怒更示焚棄之典以懲顯負之蹤宜追削爲凶逆百姓仍委河南府揭屍於都門外聚衆焚燒

追廢皇太后何氏勅

皇太后位承坤德有愧母儀近者凶逆誅夷宮闈詞連醜狀尋自崩變以謝萬方朕以幼沖君臨區宇雖情深號慕而法難徇私勉循秦漢之規須示追降之典其遣黃門收

所上皇太后寶冊追廢爲庶人宜差官告郊廟

停郊祀勅

朕以謬荷丕圖禮合親謁郊廟先定來年正月上辛用事
今以宮闈內亂播於醜聲難以慙恧之容入於祖宗之廟
其明年上辛親謁郊廟宜停

責授張廷範等勅

太常卿張廷範太常少卿裴礪溫鑾祠部郎中知制誥張
茂樞等蔣元暉在樞密之時與柳璨張廷範共爲朋扇日
相往來假其遊宴之名別貯傾危之計苟安重位酷陷朝

臣既比陰謀難寬大辟柳璨已從別勅處分廷範可責授
萊州司戶裴礪等常同聚會固共包藏礪可青州北海尉
璽臨淄尉茂樞博昌尉並員外置

誅張廷範等勅

張廷範性惟庸妄志在回邪不能保慎寵榮而乃包藏凶
險密交柳璨深結元暉晝議宵行欺天負地神祇共怒罪
狀難原宜除名委河南府於都市集衆以五車分裂溫璽
裴礪張茂樞並除名委於御史臺所在賜自盡柳璨弟瑀
瑊送河南府決殺

賜柳璨自盡勅

密州司戶柳璨交通悖逆背負明恩每稔禍於偷安欲危人而自固罔知畏憚惟肆奸回旣凶惡以貫盈實朝野而共怒況復聚貪爵秩恣逞威權據其狡猾之端須降誅鋤之命宜除名配崖州長流百姓委御史臺差人所在賜自盡

冊吳王錢鏐勅

定亂安國功臣鎮海鎮東軍節度浙江東西道觀察處置等使淮南東面行營招討營田安撫兩浙鹽鐵制置發運

等使開府儀同三司守侍中兼中書令杭越兩州刺史上
柱國吳王食邑九千戶實封五百戶錢鏐總臨兩鎮早立
殊功撫制三吳久聞異政一榮封爵再換星霜蓋緣道路
阻艱遂致冊書留滯近者潭洪水陸並已通流元勲舉議
請行典禮冀免稽於制命俾速達於朝恩須議施行實爲
允當明甄酬之寵諧僉屬之情其所封吳王策禮宜令所
司擇日備禮冊命

明經科準常例送禮部勅

取士之科明經極重每年人數已有舊規去夏雖舉條流

蓋慮所司踰濫今者國子監既有聞奏河南府亦具陳論不念遠人何以誘進只在乎升降之際切務公平又何必解送之時便爲沙汰將免遺才之嘆須開積善之門特改舊條俾循往例國子監河南府所試明經並依準常例解送禮部所放人數亦許酌量施行但不得苟徇屬求遂致僥倖兼下諸道準此

允增貢舉額數勅

朝廷取士之科每歲擇才之重必資藝實以副勤求或來自遠途或久稽鄉薦今年就試多有屈人所司奏論是宜

俞允苟叶無私之道俾開振滯之門切在精詳佇觀公當其禮部所放進士於舊年人數外宜令更添兩人

停戎昭軍額勅

天祐二年九月二十二日於金州置戎昭軍割均房二州爲屬郡比因馮行襲叶贊元勲克宣丕績用獎濟師之效遂行割地之權今命帥得人疇庸有秩其戎昭軍額宜停其均房二州却還山南東道收管

停忠義軍額勅

襄州近因趙匡凝作帥請別立忠義軍額旣非往制固是

從權忠義軍額宜停廢依舊爲山南東道節度使

令崇勲殿候對勅

貞觀大殿朝廷正衙遇正至之辰受羣臣朝賀比來視朔未正規儀其入閣自今後宜令宰臣文武百寮於崇勲殿候對付所司

黜邠王震勅

震就列朝行守官宗寺俄從私便久去上京旣稍失於規程宜特示於黜免勒停見任并落下襲封

停河南監牧諸司勅

牛羊司牧管御廚羊并乳牛等御廚物料元是河南府供進其肉便在物料數內續以諸處送到羊且令牛羊司逐日送納今知舊數已盡官吏所繇多總逃去其諸處續進到羊並舊管乳牛並送河南府牧管其牛羊司官吏並宜停廢

獎王茂章勅

王茂章能分逆順捨彼狂迷弃楊渥之亂邦不同奸險投錢鏐之巨鎮思託賢良旣明向國之心頗見立身之道元戎所薦義節昭然須行激勸之規用示獎酬之寵宜授金

紫光祿大夫檢校太保兼御史大夫

禪位冊文

皇帝若曰咨爾天下兵馬元帥相國總百揆梁王朕每觀
上古之書以堯舜爲始者蓋以禪讓之典垂於無窮故封
泰山禪梁父畧可道者七十二君則知天下至公非一姓
獨有自古明王聖帝焦思勞神惴若納隍坐以待旦莫不
居之則兢畏去之則逸安且軒轅非不明放勲非不聖尚
欲遊於姑射休彼太庭矧乎厯數尋終期運久謝屬於孤
藐統御萬方者哉況自懿祖之後嬖幸亂朝禍起有階政

漸無象天網幅裂海水橫流四紀於茲羣生無庇洎乎喪
亂誰其底綏洎於小子粵以幼年繼茲衰緒豈茲沖昧能
守洪基惟王明聖在躬體於上哲奮揚神武戡定區夏大
功二十光著冊書北越陰山南踰瘴海東至碣石西暨流
沙懷生之倫罔不悅附矧予寡昧危而獲存今則上察天
文下觀人願是土德終極之際乃金行兆應之辰況十載
之閒彗星三見布新除舊厥有明徵謳歌所歸屬在睿德
今遣持節銀青光祿大夫守中書侍郎同中書門下平章
事張文蔚等齎皇帝寶綬敬遜於位於戲天之厯數在爾

躬允執其中天祿永終王其祗顯大禮享茲萬國以肅膺
天命

欽定全唐文卷九十五目錄

太宗徐賢妃

奉和御製小山賦

諫太宗息兵罷役疏

高宗武皇后一

勞韋安石手制

褒廣州都督王方慶制

釋教在道法上制

置鴻宜鼎稷等州制

欽定全唐文

卷九十五

目錄

以鄭汴等州爲王畿制

禁喪葬踰禮制

暴來俊臣罪狀制

改定閏月制

定伎術官進轉制

禁僧道毀謗制

却置潼關制

誅唐波若制

答王方慶諫孟春講武手制

授狄仁傑內史制

禁葬舍利骨制

停楊素子孫京官侍衛制

令韋叔夏等刊定司禮儀注制

授唐休璟左庶子同三品制

授相王并州牧制

授相王雍州牧制

授韋嗣立鳳閣侍郎平章事制

許姚元之解職制

金史卷之五
求賢制

諸王男等加封邑制

加嗣陳王延暉實封制

新都郡主出降制

樂安郡主出降制

新都郡主等出降制

義安郡主出降制

壽昌仙源縣主出降制

命皇太子監國制

欽定全唐文卷九十五

太宗徐賢妃

賢妃名惠湖州長城人八歲自曉屬文太宗召爲才人再遷充容帝崩哀慕成疾永徽元年卒年二十四贈賢妃

奉和御製小山賦

惟聖皇之御寓鑒敗德於前規裁廣知以從狹抑高心而就卑懼逸情之有泰欣靜慮於無爲於時季春移序初光入暑露溽池臺煙霏林籟睿情悵以無歡懷仁智而延佇思寓賞以登臨非騁麗於茅宇殊華嶽之削成異羅浮之

移所爾其表玩宸衷故作離宮含仁自下帶嶮非崇分上
林之卉木點重巒之翠紅葉新抽而不樹花散植而無叢
雜當窗之帶柳交約砌之珪桐纖塵集兮朝嶺峻宵露晞
兮夕澗空影促圓峯三寸日聲低疊嶂一尋風風輕兮拂
蘭蕙日斜兮蔭階砌蝶留粉於巖端蜂尋香於嶺際草臨
波而側影石瑩流而倒勢雖蓬瀛之蘊奇故未留於神睇
彼崑閬之稱美詎有述於天製豈若數簣之形託於掖庭
俯依綺檻仰映朱楹恥巖崖之鄙薄荷眺矚之恩榮期保
終於一國奉天睠於千齡

諫太宗息兵罷役疏

自貞觀以來二十有二載風雨調順年登歲稔人無水旱之弊國無饑饉之災昔漢武守文之常主猶登刻玉之符齊桓小國之庸君尚圖泥金之事陛下推功損己讓德不居億兆傾心猶闕告成之禮云亭佇謁未展升中之儀此之功德足以咀嚼百王網羅千代者矣然古人有言雖休勿休良有以也守初保末聖哲罕兼是知業大者易驕願陛下難之善始者難終願陛下易之竊見頃年以來力役兼總東有遼海之軍西有崑邱之役士馬疲於甲冑舟車

倦於轉輸且召募役戍去留懷死生之痛因風阻浪往來
有漂溺之危一夫力耕卒無數十之獲一船致損則傾數
百之糧是猶運有盡之農工填無窮之巨浪圖未獲之他
衆喪已成之我軍雖除凶伐暴有國常規然黷武翫兵先
哲所戒昔秦王并吞六國反速危亡之兆晉武奄有三方
翻成覆敗之業豈非矜功恃大棄德而傾邦圖利忘害肆
情而縱欲遂使悠悠六合雖廣不救其亡嗷嗷黎庶因弊
以成其禍是知地廣非常安之術人勞乃易亂之源願陛
下布澤流仁矜弊恤乏減行役之煩增湛露之惠妾又聞

爲政之本貴在無爲竊見土木之功不可兼遂北闕初建
南營翠微曾未踰時玉華創制雖復因山藉水非無架築
之勞損之又損頗有工力之費終以茅茨示約猶興木石
之疲假使和雇取人不無煩擾之弊是以卑宮菲食聖王
之所安金屋瑤臺驕主之爲麗故有道之君以逸逸人無
道之君以樂樂身願陛下使之以時則力無竭矣用而息
之則人斯悅矣夫珍翫伎巧乃喪國之斧斤珠玉錦繡實
迷心之醢毒竊見服翫纖靡如變化於自然職貢珍奇若
神仙之所製雖馳華於季俗實敗素於淳風是知漆器非

延叛之方桀造之而人叛玉杯豈招亡之術紂用之而國
亡方驗侈麗之源不可不遏作法於儉猶恐其奢作法於
奢何以制後伏惟陛下明鑒未形智周無際窮奧祕於麟
閣盡採蹟於儒林千王治亂之蹤百代安危之跡興衰禍
福之數得失成敗之機固亦包吞心府之中循環目圍之
內乃宸衷之久察無假一二言焉唯恐知之非難行之不
易志驕於業泰體逸於時安伏惟抑意裁心慎終如始削
輕過以滋重德擇後是以替前非則鴻名與日月無窮盛
德與乾坤永大

高宗武皇后

后名墨并州文水人工部尚書荊州都督封應國公士彥之女高宗立爲昭儀進號宸妃永徽六年立爲皇后上元元年進號天后中宗即位尊爲皇太后臨朝稱制尋自稱皇帝改國號曰周在位二十二年中宗反正謚曰大聖則天皇后天寶八載定謚則天順聖皇后

勞韋安石手制

聞卿在彼庶事存心善政表於能官仁明彰於鎮撫如此稱職深慰朕懷

褒廣州都督王方慶制

朕以卿歷職著稱故授此官既美化遠聞實副朝寄今賜卿雜綵六十段并瑞錦等物以彰善政也

釋教在道法上制

朕先蒙金口之記又承寶偈之文歷教表於當今本願標於曩劫大雲闡奧明王國之禎符方等發揚顯自在之丕業馭一境而敦化宏五戒以訓人爰開革命之階方啟惟新之運宜叶隨時之義以申自我之規雖實際如如理忘於先後翹心懇懇畏展於勤誠自今已後釋教宜在道法

之上緇服處黃冠之前庶得道有識以皈依極羣生於迴
向布告遐邇知朕意焉

置鴻宜鼎稷等州制

鸞臺朕聞先王疆理天下也莫不料其土宇相其地宜分
五服以應財成宅三川而適通變辨方樹辟協和之道以
隆置郡罷侯經始之圖載遠而區分或異制度罕同連率
法於在鎬牧守儀於起沛官稀則政毀地狹則人勞義在
隨時期於致乂我大周席蘿闡化夢梓登期通三授元扈
之濱得一昇翠瀉之汭維嵩設險聳危峯於少室在河稱

防導洪波於太史卜茲洛食是曰奧區物產孔殷形勝斯
在朕仰膺睠命俯叶樂推即灋澗之基恢鼎革之運珍符
寶貺賁發郊藪佳氣榮光昭煥川澤建明堂而陟配立清
廟以嚴禋方闡隆周之業以光卜年之兆況成王定鼎此
則餘基永言朝貢寔歸中壤是霜露之所均當水陸之交
會庶齊勞逸無隔遐邇邇作制王畿雖憲章於故實緬維帝
邑未折衷於新規宜宏自我之典式廣來蘇之澤但京兆
之地舊號秦中迺睠編氓最爲繁殖一州獨理事多擁滯
宜令雍州管內析置五州其間於雍州以西安置潼關即

宜廢省然以千里之內舊制通畿征賦所出事資廣遠又王侯設險以固其國若無襟帶何以爲守雍州并所析州同州太州並通入畿內洛州南面東面北面仍各置關庶食采之地自分湯沐之邑弃縑之客更從軒蓋之遊其雍州舊管及同太等州土狹人稠營種辛苦有情願向神都編貫者宜聽仍給復三年百姓無田業者任其所欲即各差清強官押領并許將家口自隨便於水次量給船乘作般次進發至都分付洛州受領支配安置訖申司錄奏聞朕聞人惟邦本本固邦寧將以不肅而成旣庶而富欲令

率土黔黎咸得遂性勞來安堵人不失業其有諸州人或先緣饑歲流宕忘歸或父兄去官因循寄住爲籍貫屬恐陷刑名荏苒多時未經首出衛士雜色人等并限百日內首盡任於神都及畿內懷鄭汴許汝等州附貫給復一年復滿便依本番上下其官人百姓有情願於洛懷等七州附貫者亦聽應須交割及發遣受領並委本貫共新附州分明計會不得因茲隱漏戶口虛蠲賦役并新析五州三面及雍州以西置關處所司具爲條例務從省便奏聞

以鄭汴等州爲王畿制

鸞臺朕聞上圖列宿垂七紀而環紫微下料物土制八紘
而尊赤縣是以帝猷方盛開甸服於平陽王業肇基創神
郊於景亳雖政或沿革道有汙隆強幹弱枝率由茲典用
能體國經野阜俗安人法天險之崇高顯宸居之壯觀朕
膺此符命大庇黎元俯順謳歌君臨區夏紹隆周之睿業
因丕洛之鴻基相彼土中實惟新邑五方入貢兼水陸之
駿奔六氣運行均霜露而調序山川形勝祥祉荐臻遠寤
乾心近收眚欲式建宗社大啟神都知王者之無外明在
德之可久

闕一字

自夏殷分土列爵爰及秦漢置守罷侯所

以東姬握圖王畿存千里之制西京御厯帝里據三輔之
饒否泰旣殊損益且異務歸於適物義尚於隨時朕以鼎
業惟初寶祚伊始斟酌今古申畫封疆征賦科徭實資寬
簡沃墾勞逸宜有平分緬懷習武之規載隆辨方之術可
以洛東鄭州汴州南汝州許州西陝州虢州北懷州澤州
潞州東北衛州西北蒲州爲王畿內鄭州汴州許州可置
八府汝州可置二府衛州可置五府別兵皆一千五百人
所司詳依格式明爲條例庶使固本之道輻輳於前修足
兵之義牢籠於振古主者施行

禁喪葬踰禮制

喪葬禮儀蓋惟恒式如致乖越深蠹公私乃有富族豪家
競相踰濫窮奢極侈不遵典法至於送終之具著在條令
明器之徒皆有色數遂敢妄施隊伍假設幡旛兼復創造
園宅彫翦花樹或桐闢木馬功用尤多或吉輦凶闕綵飾
殊貴諸如此類不可勝言貴賤旣無等差資產爲其損耗
旣失芻靈之義殊乖朴素之儀此之慙違先已禁斷州牧
縣宰不能存心御史金吾曾無糾察積習成俗頗紊彝章
即宜各令所司重更申明處分自今已後勿使更然

暴來俊臣罪狀制

來俊臣閭巷小人奸險有素以其頗申糾摘將謂微效款誠遂拔自泥塗齒於簪紱歲月滋久涓埃莫施專搆凶邪每相朋扇隱逆賊之妹尤深嬖寵逼良家之女以爲妾媵作威作福無禮無義剝奪甚萑蒲之盜贓賄踰邱山之積諸王等盤石宗枝必期毀敗南北衙文武將相咸將傾危冀得竊弄機權方擬潛爲悖逆無君之心已著不臣之迹顯然天下側目含靈切齒擢其髮不足以數罪粉其骨不足以塞愆棄市之刑嚴酷未極汙官之辟輿議所歸宜加

赤族之誅以雪蒼生之憤

改定閏月制

頃所司造歷以蜡月爲閏稽考史籍便紊舊章遂令去歲之中晦仍見月但恐寒暑未節有爽天經用深欽若之懷式陳敬授之典重更尋討果差一日履端舉正屬在於茲宜改歷惟新革非於既往可以十月爲閏十月一日甲子朔旦冬至

定伎術官進轉制

量才授職自有條流常秩清班非無差等比來諸色伎術

因營得官及其升遷改從餘任遂使器用紕繆職務乖違不合禮經事須改轍自今本色出身解天文者進轉官不得過太史令音樂者不得過太樂鼓吹署令醫術者不得過尚藥奉御陰陽卜筮者不得過司膳寺諸署令有從勲官品子流外國官參佐視品等出身者自今以後不得任京清要等官若累限應至三品不須進階每一階酬勲兩轉

禁僧道毀謗制

佛道二教同歸於善無爲究竟皆是一宗比有淺識之徒

競生物我或因懟怒各出醜言僧既排斥老君道士乃誹
謗佛法更相訾毀務在加諸人而無良一至於此且出家
之人須崇業行非聖犯義豈是法門自今僧及道士敢毀
謗佛道者先決杖即令還俗

却置潼關制

鸞臺山河作固肇自往圖關梁是修抑惟前典朕情存太
朴志在無外成臯姬陝勿用咽喉函谷秦封解其衿帶欲
使鴈行靡拾鷄居不擾而吐俗澆弊浮情者多非所以禁
絕末游作限中外事資權變理貴從宜便可率由舊章安

置應須修補及官典兵防一事已上所司速準例處分其
神都四面應須置關之處宜令檢校文昌虞部郎中王元
珪即往檢行詳擇要害務在省功斟酌古今必令折衷還
日具圖樣奏聞

誅唐波若制

故趙州刺史高叡狂賊既至死節不降長史唐波若不能
固城相率歸賊高叡已加褒贈波若等身死破家賞罰既
行須敦懲勸宜頒示天下咸使知聞

答王方慶諫孟春講武手制

比爲久屬太平多厯年載人皆廢戰並悉學文今者用整
兵威故令教習卿以春行冬令則水潦爲敗舉金傷木則
便害發生循覽所陳深合典禮若違此請乃月令虛行佇
啟直言用依來表

授狄仁傑內史制

鸞臺訏謀房帷秉鈞之任爲重典綜絲綸揮翰之才是屬
銀青光祿大夫守納言上柱國汝陽縣開國男狄仁傑地
華簪組材標棟幹城府凝深宮牆峻邈有八龍之藝術兼
三冬之文史雅達政方早膺朝寄出移節傳播良守之風

入踐臺閣得名臣之體豈惟懷道佐明見期於管樂故以竭誠匡主思致於堯舜九重肅侍則深陳可否百辟在庭則顯言得失雖從容顧問禮被於皇闈而斟酌輕重事隆於紫誥宜遷掌闥之秩式懋專車之寵可守內史散官勲封如故主者施行

禁葬舍利骨制

釋氏垂教本離死生示滅之儀固非正法如聞天中寺僧徒今年七月十五日下舍利骨素服哭泣不達妙理輕徇常情恐學者有疑曾不謗毀宜令所管州縣即加禁斷

停楊素子孫京官侍衛制

隋尚書令楊素昔在本朝早荷殊遇稟凶邪之德有諂佞之才惑亂君上離間骨肉搖動冢嫡寧惟掘蠱之禍誘扇後主卒成請蹠之釁隋室喪亡蓋惟多僻究其萌兆職此之由生爲不忠之人死爲不義之鬼身雖幸免子竟族誅斯則姦逆之謀是爲庭訓險薄之行遂成門風刑戮雖加支允仍在何得肩隨近侍齒列朝行朕接統百王恭臨四海上嘉賢佐下惡賊臣常欲從容於萬機之餘褒貶於千載之外況年代未遠耳目所存者乎其楊素及兄弟子孫

已下並不得令任京官及侍衛

令韋叔夏等刊定司禮儀注制

吉凶禮儀國家所重司禮博士未甚詳明成均司業韋叔夏太子率更令祝欽明等博涉禮經多所該練委以參掌冀得精詳自今司禮所修儀注並令叔夏等刊定訖然後奏進

授唐休璟左庶子同三品制

鸞臺獻替諸闡管綜王職聿求多士必在正人夏官尚書同鳳閣鸞臺三品上柱國酒泉縣開國公唐休璟業履清

醇恭肅忠亮言必從行學以知道居八座之重握四嶽之
要出將入相允文允武謀猷是屬宏益以深頃以暮年固
辭退位就閒去劇優賢尚齒巨源請老仍參翼贊之榮叔
子養德還預朝國之議宜輟五曹之務俾同三令之班可
金紫光祿大夫行太子左庶子依舊同鳳閣鸞臺三品勲
封如故主者施行

授相王并州牧制

鸞臺神畿緝化咨牧所難天府屯兵命將爲重惟賢是擇
非親勿居太子左千牛衛率安北都護相王旦黃道承暉

紫庭趨訓儀表瓌傑識量虛明資忠孝以立身仗經書而致德勇高衛霍詞優楊史必能外振威聲內清戎政宜膺夾輔之寄兼司羽翼之重可并州牧餘如故

授相王雍州牧制

鸞臺京輔才難神畿化首四方取則萬邦承流自非明德懿親何以宣風翊政并州牧太子左千牛衛宰相王旦紫庭趨訓青社䟽封雅度冲深瓌資秀傑忠孝天假禮樂日宣闕朔掌望隆前率北野蒞戎聲高臥護懷共理之幹有兼辦之能宜紆朝綽用清都輦可雍州牧

授韋嗣立鳳閣侍郎平章事制

鸞臺鳳池清切鸞渚便蕃諷納兩闡允資一德中散大夫
天官侍郎韋嗣立當朝人望奕代相門道周性全才高識
遠誠以待物寬而容衆往自綸翰五字見推洎處提衡九
流式序懷宗廟之掌有社稷之能宜竭忠賢翊宣政化可
守鳳閣侍郎同鳳閣鸞臺平章事散官如故主者施行

許姚元之解職制

忠爲令德孝乃天經義著君親道存愛敬其或兼者可不
美歟銀青光祿大夫行鳳閣侍郎兼檢校相王府長史同

鳳閣鸞臺三品姚元之自掖垣趨侍廊廟謀猷竭節盡誠
謹言正議始終無替宏益以多近以母氏衰老情兼喜懼
在休沐之期闕晨昏之禮乞解所職以就閒養外奏內請
志到詞勤宜遂懇情用敦孝道睠彼藩邸高選經佐俾從
梁苑之游以致潘園之樂可行相王府長史一事已上并
同三品

求賢制

鸞臺朕聞璧月珠星實爲麗天之像蒼波翠岳爰標紀地
之形是知正位辨方體元建極不憑羣彥孰贊皇猷事總

萬機心覃億兆恒靡遑於寢食誠罔憚於憂勤佇賢良則
終宵失寢詢政道則竟日停餐豈直未明求衣晷晷忘食
而已比者屢垂旌帛頻訪邱園雖志切於旁求然未逢於
俊乂待舟航而涉水思羽翼而凌虛今者更啟搜揚庶得
不遺草澤其有文可以經邦國武可以定邊疆蘊梁棟之
宏才堪將相之重任無隔士庶具以名聞若舉得其人必
當擢以不次如妄相推薦亦寘科繩所冀多士襲於隆周
得人踰於盛漢布告遐邇知朕意焉

諸王男等加封邑制

鸞臺昔子弟咸建姬祚以隆支體畢侯漢國斯永某王男
某等普谷分彩天池演派金相比映玉樹聯芳垂髻欽愛
敬之風總角聞詩禮之訓三雍肇建萬品維新褒德敘勞
式遵行慶之典䟽藩樹屏允叶推恩之令可封襄陽縣開
國男

闕

加嗣陳王延暉實封制

鸞臺睦親之道推恩之義家國所同古今無異雲麾將軍
行太子左鶴禁率嗣陳王延暉地承枝葉戚在葭莩幼聞
詩禮躬踐名教賞勸未酬井邑猶虛宜申優典用光近族

延暉兄弟可別令實封一百五十戶

新都郡主出降制

鸞臺皇太子長女新都郡主資靈玉裕比價瑤臺發艷天
庭仰儷星辰之象承徽儲禁內稟河洲之德惠心明婉柔
範端莊始踰待年之期甫及有行之歲通事舍人楊泚門
擅槐鼎地連姻戚箕裘克隆才質兼茂可以膺合姓之典
奉御輪之躅標梅興詠方邀六禮之歡在楚言歸宜迨三
星之夕郡主可出適楊泚

樂安郡主出降制

鸞臺皇太子第八女樂安郡主承規銀榜毓彩銅樓寶婺
連暉瓊娥比艷貞明發於閭訓窈窕齊於國風固已儀範
不憊柔閑有裕蘋蘩入薦旣成四教之德桃李方春宜用
三周之禮可出適符節郎宏農楊承烈男守文

新都郡主等出降制

鸞臺皇太子第二女新都郡主相王長女壽昌縣主第二
女安興縣主等並毓靈天漢稟訓皇闈惠性早成淑德克
茂粉澤四教針縷七篇笄年在時令月有典宜穆三從之
禮式光百兩之迂新都郡主可出適左衛翊盧威壽昌縣

主可出適太子右奉御楊尚一安興縣主可出適梁王府
參軍薛琳所司準式

義安郡主出降制

鸞臺皇太子第二女義安郡主重月降輝發春揚彩四德
淳茂六行恭修歲在結纓時方納幣均州司倉裴巽門胄
清顯風範昭明旣諧委鴈之祥宜縹盤螭之禮郡主可出
適巽仍以今月十四日成禮所司準式

壽昌仙源縣主出降制

鸞臺相王長女壽昌縣主第五女仙源縣主並稟靈天漢

漸訓王門質耀桃李性芬蘭蕙帝孫將降甫及笄年國人
所承允歸時望清廟齋郎崔珍太子左奉御薛伯陽並地
襲衣冠躬履名教風猷美茂才藝紛綸飛鳳之占既合其
吉乘龍之背宜膺雙舉壽昌縣主可出適珍仙源縣主可
出適伯陽仍令所司準式

命皇太子監國制

鸞臺多難興王殷憂啟聖蕭牆之禍自古有之朕以虛寡
宿承先顧社稷宗廟寄在朕躬親理萬幾年逾二紀幸得
九元垂祐四海乂安何嘗不日昃忘食夜分輟寢戰戰而

臨寶位乾乾而握聖圖憂百姓之不寧懼一物之失所但以久親庶政勤倦成勞頃日以來微加風疾逆豎張易之昌宗兄弟比緣薄解調鍊久在園苑驅馳錫以殊恩加以顯秩不謂豺狼之性潛起梟獍之心積日包藏一朝發露皇太子顯元良守器純孝奉親知此釁萌奔衛宸極與北軍諸將戮力同心勦撲凶渠咸就梟斬斯乃天地之大德幽明所贊叶者乎豈惟朕躬之幸抑亦兆庶之福朕方資藥餌冀保痊和幾務既繁有妨攝理監臨之寄屬在元良宜令皇太子顯監國百官總已以聽朕當養閒高枕庶獲

欽定全唐文

卷九十五

五十三

延齡可大赦天下

天